

Mtafakari Mungu Daima

Kwa hiyo nampigia Baba magoti, ambaye kwa jina lake ubaba wote wa mbinguni na wa duniani unaitwa, awajalieni, kwa kadiri ya utajiri wa utukufu wake, kufanywa imara kwa nguvu, kwa kazi ya Robo wake katika utu wa ndani.—Waefeso 3:14-16.

Nguvu ya kiroho inayozungumziwa hapa ni kitu ambacho kila mtu anaweza kukipata; lakini tunawezaje kuipata? Pengine tuko gizani, tukihisi upweke na kuvunjika moyo na kwamba Mungu hatupendi. Kama ni hivyo, hatupaswi kuzipa hisia nafasi; hisia hazina kitu cha kufanya na jambo hili. Tunalazimika kulichukua Neno la Mungu kama linavyosomeka, maneno ya Yesu kama alivyoyasema.

Sikia maneno haya ya Mwokozi wetu: “Basi kila asikiaye hayo maneno yangu, na kuyafanya, atafananishwa na mtu mwenye akili, aliyejenga nyumba yake juu ya mwamba; mvua ikanyesha, mafuriko yakaja, pepo zikavuma, zikaipiga nyumba ile, isianguke; kwa maana misingi yake imewekwa juu ya mwamba.” Ni fursa ya kila mmoja wetu kujenga juu ya Mwamba wa Milele; ndipo hatutamvunjia heshima Mungu, wala kwa maneno na kwa matendo yetu kutapanya mbali na Kristo....

Unapojiweka mwenyewe juu ya rehema za Mungu na kumwamini bila maswali kwa Neno Lake, na bado adui akaja na kudokeza makosa na dosari zako, na kukwambia kwamba wewe si bora kuliko kabla ya kumtafuta Bwana, unaweza kumwelekeza kwa Yesu na kurudia ahadi Zake na kueleza kile Alichokifanya kwa ajili yako.

Mtume anaendelea: “Kristo akae mioyoni mwenu kwa imani mkiwa na shina na msingi katika upendo; ili mpate kufahamu pamoja na watakatifu wote jinsi ulivyo upana, na urefu, na kimo, na kina; na kuujua upendo wake Kristo, upitao ufahamu kwa jinsi ulivyo mwingi, mpate kutimilika kwa utimilifu wote wa Mungu.” Wakati huu utimilifu wote wa Mungu unapokuwa umewekwa karibu nasi, tunaridhika kiurahisi jinsi gani.

Tumejizoeza kufikiri kwamba inatosha kuwa na maarifa ya ukweli bila ya nguvu yake itakasayo. Funda dogo tu kwenye chemchemi ya uzima inakidhi kiu yetu. Hatuji tena na tena kunywa. Lakini hivi sivyo ilivyo kulingana na mpango wa Mungu. Roho zetu zinapaswa kuonea kiu daima maji ya uzima. Mioyo yetu inapaswa kumwendea Yesu daima, ikitamani kujumuika pamoja Naye. Ni kuonea njaa na kiu ya haki ndiko kutakakotuletea kipimo kamilifu cha neema Yake.

Henoko “alitembea na Mungu” lakini je, aliwezaje kupata urafiki huu mzuri wa karibu? Ni kwa kuwa na tafakari hii ya Mungu mbele zake daima. Alipotoka na kuingia, tafakari yake ilikuwa juu ya wema, ukamilifu na uzuri wa tabia ya Mungu. Na kadiri alivyofanya hivyo, alibadilishwa katika sura tukufu ya Bwana wake; kwa maana ni kwa kutazama tunabadilishwa

(The Signs of the Times, Agosti 18, 1887).